

四庫全書

集部

欽定四庫全書

集部

宋詩鈔卷三十

詳校官中書臣賈鏊

主事銜臣徐以坤覆勘

總校官編修臣王燕緒

校對官中書臣劉源溥

謄錄監生臣鄭家屏

欽定四庫全書

宋詩鈔卷三十

內閣中書舍人吳之振編

張耒宛丘詩鈔

耒字文潛號柯山人稱宛丘先生楚州淮陰人少善屬文遊學于蘇轍轍愛之因得從軾遊稱其汪洋沖澹有一唱三歎之聲第進士歷官至直龍圖閣知潤州坐蜀黨徙宣州謫監黃州酒稅徽宗起爲太常出

知穎汝復坐黨籍落職在穎時聞蘇軾訃至爲舉哀
行服遂貶房州別駕安置于黃後五年得許自便居
陳時二蘇及黃晁諸人相繼殄歿惟未尚存士人就
學者衆分日載酒肴事之其名益甚卒年六十一史
稱其詩效白居易樂府效張籍然近體工警不及白
而醞藉閒遠別有神韻樂府古詩用意古雅亦長慶
爲多耳子瞻謂秦得吾工張得吾易謾相壓也要在
秦晁以上

休日同宋遐叔詣法雲遇李公擇黃魯直公擇烹
賜茗出高麗盤龍墨魯直出近作數詩皆奇絕
坐中懷無咎有作呈魯直遐叔

休日不造請出遊賢友同城南上人者宴坐花雨中金
猊散香霧寶鐸韻天風鳥語演實相飯香悟真空尚書
二三客淨社繼雷宗黃子發錦囊句有造物功握中一
寸煤海外千年松誰降午睡魔賜茗屠團龍鬼子卧城
西咫尺不可逢宜無坐中客終覺欠此公歸帽見新月

撲衫暮塵紅困眠有餘想却聽寺樓鐘

掛虎圖于寢壁示桔程

畫工出幻事縞素發原藪蕭蕭白茅低凜凜北風走耽
然老於菟舉步安不驟目光炯雙射怒吻呀欲受彼彪
擲其旁文彩淡初就雖然竊形似已足走百獸煩君衛
吾寢振此蓬華陋坐令盜肉鼠不敢窺白晝

神運殿望香爐天池等峰晚宿官廳明日早發

遠公不出山坐受龍天供地祇敢愛寶木石親輸送巖

巖千年屋山立屹不動風雲宿脩梁星斗近華棟亭亭
碧香爐蒼荀時自涌五雲巖擁衛天樂下鸞鳳神池閔
寶像光怪發巖洞誰能陟其顛手攬游龍鞚東堂黃金
藏龍像儼環拱蕭條亡國輦拙撲昔誰用掃堂爲一睡
清極乃無夢思歸戒晨發結束勤僕從鴻鍾振林莽月
落朝嵐重再往墮渺茫猿鶴應嘲諷

贈張公賁

我昔爲諸生奉書諫議公後來辱稱獎禮數賓客同決

科甫弱冠年少氣如虹歸來陪後乘不責醉後恭孤舟
梁宋郊旅態萃百窮拜公睢陽府笑語若春風人事不
可期俯仰異吉凶平生丹竈術馬鬣哭新封十年得吾
弟懷舊涕沾膺清貧守家法眉宇肖德容交臂是非外
爲寮兄弟中東軒語長夏葵竹羅青紅西舍雪夜歡玉
顏醉瑤鍾欲飲徑相就三更叱閤翁鯨吸絕遺滴山頽
信傾峰搜抉盡醬茹楂梨倒筐籠通宵兩沉醉午起頭
如蓬人生定當爾事去挽驚鴻河梁繫君馬一笑喜相

逢憐君碧紗愧夜淚哭葦叢我方困齏鹽酸寒官辟靡
同尋舊遊地塵壁罅絲蟲啼鳥古寺間夏陰小園空酒
市逢好好琵琶失玲瓏歌舞一分散賓僚亦西東忘情
猶一歎齊物論非通官冷隱朝市端能信余慵人生當
富貴子盍自磨礪便當引五車一一貯心胷功就螳作
埵叢成虵化龍北郊分袂歸作惡驚兒童長謠代晤語
發予一笑哄

離黃州

扁舟發孤城揮手謝送者山回地勢卷天豁江面瀉中
流望赤壁石脚挿水下昏昏煙霧嶺歷歷漁樵舍居夷
實三載鄰里通假借別之豈無情老淚爲一洒篙工起
鳴鼓輕櫓健於馬聊爲過江宿寂寂樊山夜

宿樊溪

黃州望樊山秀色如可鑒扁舟橫江來山脚繫吾纜大
川失洶湧淺水澄可攬北風吹踈雨夜枕舟屢撼齊安
不可望滅沒孤城暗奔流略溪口龍脣屢窺瞰平生千

金質戒懼敢忘慙茲遊定何名耿耿有餘念

道士磯

匡廬奠九江苗裔遍南服橫江蔽原野內外實一族危
磯挿江生石色擘青玉蛟龍穴亂石猱攫在喬木我行
季冬月江蹟在山腹扁舟如鏡面清淨不可觸躋攀旣
不可千古長幽獨緬想遂古初巢居戒樵牧

離樊口宿巴河遊馬祈寺

扁舟下樊溪江南正清瀉曉登巴河岸極目望春野步

尋脩竹寺古木爭偃亞云昔孫仲謀刑牲致師禡雄圖
邈已矣英槩足悲吒石梯造雲霧丹白開廣廈山僧安
寂寞畏冷不出舍勞生渴閒境頓使我心寫晚江平若
席風勢欲相借

龜陵灣阻風三日送禱孤山而風止

積水多疾風三日阻我舟天寒波濤惡岸窰騰龍虬五
更船篷鳴冷氣入衾裯平明諸山雪爛漫鋪琳瑯篙工
笑相顧白我巴船頭永愧小孤神霧鬢橫星眸倉卒禱

卽應知我厭滯畱稍晴景物好柳色含新柔春風我故
舊迎我入東州

自離富池凡三禱順濟龍求便風皆獲應又風日
清霽舟行安穩委曲如所欲感而成詩

旗尾指船頭篙工告風便張帆如雙櫓去勢如脫箭船
傍兩高山過目若流電波平舟穩駛客寢兀未變吾聞
江西龍神力回宇縣往來萬夫禱正直乃獲願嗟余何
所恃誠恪無所薦神豈哀吾窮有賜不待獻乃知人窮

我本不坐神譴人間事苦異未易以言辨坐令千里遠
近若在几研慙非謝宣城援筆賦靜練

出山

青山如君子悅我非姿媚相逢一開顏便有論交意今
晨決然去摻若執我袂謂山無見畱此事寧久置道邊
青髮翁下有白玉髓斲之龍蛇窟自足飽吾世平生耽
幽獨乃若安朝市一官等塵垢安得敗成計草堂醉老
子虎溪大開士寄語二主人爲畱三畝地

離陽翟

驅車發潁川回望失嵩少
霜氛塞層空黯淡寒日曉
原田際天平百里見飛鳥
纍纍道傍丘石獸卧衰草
不知誰氏碑剝裂偶未倒
支離見隸字書帶漢筆妙
遺墳不可問文彩竟何效
永年恃金石此計久可笑
昔遊已三歲存沒傷懷抱
飽諳人世憂安得身不老

次潁川

許昌古名都氣象良未替
客子遠道來塵埃滿襟袂
黃

昏造孤驛買飯嚙枯蔽庭寬蟾蜍高霜氣徹寒被賴攜
朱提杯可具一飲費無人勸我酌孤燭伴客醉笙簫誰
家樓語笑月中市何人不行樂而我獨涕淚夜長更漏
稀風急鼓擊駛天明捲席去行止隨所值

同楊二十緱氏寺宿草酌張正民秀才見訪

契濶千里別惻愴難具言殷勤一宵語願子未卽眠空
堂燈火青旅褐借僧氈勞勞一杯酒不解道路寒經年
相從樂旣別亦茫然人間事盡爾聚散亦何歎但悲多

難身尚獲朋友懽
間關百憂中一笑直萬錢
張子年未冠已雄羣
少年巉巉坐我側
紫眸秀雙顴壯志激衰懦
清談破愁煎天明即分散
奈此情悄悄

初到都下供職寄黃九

千里不相見勞勞復何辭
不應一城中耿耿令我思
僦舍酒家樓推壚卷其旗
鼠壤敗晨炊守翁噪羣兒
馬傍挾兩羸雙踵待刻移
五日長安塵故山夢中歸
何以洗我心望君青松姿
懷情久不吐古屋絃悲詩

晚歸寄無咎

屋東雲移山屋西日半壁餘天一劍青遠雨萬絲白官
事癡可了未遭官長責惟應晁夫子不可別頃刻

西山寒溪

一本云挈家同潘郎游寒溪西山二寺
井寄邠老詩中亦顏邠老書齋名也

茲行頗間暇聊此一作山水間一作幸有所攜人臭味

同一源山蹊並脩澗嘉木間蒲蓮杉松開一作古刹一作

寺始覺此溪寒孤亭出屋背石磴相牽攀迎客窮道人

俯僂鬢眉斑釋子一作草草具麤糲雖貧有餘歡一本有三
杯徑就醉

陟嶽初
牽攀
午一作馳
登西山去一作路作九曲彎山禽慣不

驚夏木秀且繁緬懷紫髯公奠玉祠天壇豪彊一作雄豪有

遺韻興廢一作消毀無留觀空崑一泓泉引余掬清甘一作眼明

崑間泉引至人悲熱惱遺留一作此消昏煩一作驅塵煩我茶

非世間一作天上蒼月團爲爾惜不得烹啜一作澆晨

食淡一作出谷晚易陰快一作清雨時班班一作潺湲但見夾道

松龍鬚濕蒼顏念一作懷我亦顏人淡一作屏居閑一作淡柴

閑一作關不使倒珠玉使一作濟我胷中慳之官亦漫浪遇

勝却

一作即

盤桓平生據頑鈍
信命傲憂患
言歸徒旅

一作

御
疲就蔭休征鞍

讀中興頌碑

玉環妖血無人掃
漁陽馬厭長安草
潼關戰骨高於山
萬里君王蜀中老
金戈鐵馬從西來
郭公凜凜英雄才
舉旗爲風偃爲雨
洒灑九廟無塵埃
元功高名誰與紀
風雅不繼騷人死
水部胸中星斗丈
太師筆下蛟龍字
天遣二子傳將來
高山十大磨蒼崖
誰持此碑入我室

使我一見昏眸開百年廢興增歎慨當時數子今安在
君不見荒涼浯水棄不收時有遊人打碑賣

出長夏門

初望龍門

出郭心已清青山忽相對游人傍流水俯仰秀色內誰
張蒼玉屏中斷神斧快清伊瀉其間銀漢曳天派參差
樓觀出杳靄林麓邃巖聲答遠響水影弄空翠同遊得
君子同榮教授興與煙霞會選勝雖自茲高懷已塵外

飯昭果寺

飄然乘興遊肴酒笑俗具僧居致野飯草草亦有趣山
僧慣迎客煮茗新泉注巖花得春遲晚秀見紅素蕭蕭
野市井人物自來去溪光送孤舟石色照素樹題名掃
高壁歲月記所遇書罷迹已陳出門猶反顧

石樓

清溪若奔虬八鎖束其頸犇騰去莫脫擺掣恣驍猛嘈
嘈戰風霆萬鼓助其勁聲馳石崖動氣抱晴日冷我來
怯初登注視久乃定悠悠山川濶寸目羅萬景平生林

野趣疎放謝鞭警會期山月出一嘯清夜永

上方

足躡青玉磴躋攀不知勞回頭瞰木杪始覺所歷高孤
鳥去滅沒奔溪澗怒號白日當畫梁青雲送微颺坐久
神慮平微涼清骨毛但驚塵垢容俯仰近赤霄古壁有
遺字昔人嗟寂寥南風不知暑古木常蕭蕭

廣化遇雨

浮雲蔽高峰臺殿延晚色風聲轉谷豪雨脚射山白東

樓瞰虛明龍甲排檜柏蕭森異人境坐視動神魄撞鍾
寺門掩晚霽尚殘滴相攜下山去塵靜馬無迹歸來解
鞍歇新月如破壁但恐桃花源回舟已青壁

贈無咎以旣見君子云胡不喜爲韻八首

平生懷想人握手良未易接君同舍歡此事非此世十
年淮海夢一笑相逢地投分白首期願言何有旣

賢愚譬觀形美醜不自見醫肱待三折劔鐵要百鍊磨
君古青銅汰揀寄明辨一智出千愚食芹敢忘獻

文風還正始磊落有諸君
長者進後生亦使我有聞
譬如狸與虎偶使並稱文
終然不可及困我力空勤

文衰東京後特起得韓子
支撐誹笑中久乃化而靡
籍澁既洒掃後生始歸市
垂君拯溺手請效我一指

詩壇李杜後黃子擅竒勳
平生執羈勒開府與參軍
舉世秉筆徒吟哦漫云云
安知握竒律一字有風雲

觸有羸其角進有跋其胡
膏車秣吾馬白日在脩途
雖乏無何杯頗多未見書
力學致事功良田本溪鉏

黃子少年時風流勝春柳中年一鉢飯萬事寒木朽室
有僧對談房無妾持帚此道人人事誰令余獨不

南山縛虎師宵顧世書字揚眉哦楚喉鼎畔倒侯喜詩
聲一蒼蠅下到霹靂耳庸庸老尋常物外有奇偉

與潘仲達二首

東風沛甘雨百物一時好江南桃李盡紅紫到百草道
傍負擔子寒食歸祭禱念我淮上丘三年不躬掃

淮陽牡丹花盛不如京洛姚黃一枝開衆艷氣如削亭

亭風塵裏獨立朝百蓼誰知臨老眼得到美葵藿

次韻秦觀

琬琰非世珍昔以羊皮換嗟君復何求衆棄乃所玩十
年少游兄閉口受客難二毛纔一第俗子猶憤惋人間
異巧拙善琢貴顏汗嬋娟守重閨倚市爭倩盼君胡寶
滯貨屢辱訪衰懦譬猶卧仆塗更侑觥與散球然瑚璉
質磨琢爭璀璨遲君三年鳴更用驚我慢

阿几

小兒名阿几眉目頗疎明日來書案傍學我讀書聲男
兒事業多何必學讀書自古奇男子徃徃羞爲儒阿几
笑謂爺薄雲無密雨看爺飢寒姿兒豈合富貴翁家破
篋中惟有書與史教兒不讀書更欲作何事

宿虹縣驛

長隄隘舟車上下無暫歇煎熬古驛門聒聒爭填屑東
南淮浙富輸餽日填咽楚風習喧卑吳舌動嘲啗平生
耽靜意投閒劇含噦况茲道路勤強食慰飢渴年來嵩

洛興久與泉石結終當卜吾廬雲山對華髮

有感二首

昨日鷓作巢今者鷓哺兒念知三月蘭春物行已稀晚
風颯不收殘紅怨餘姿回風起輕寒擁爐火重吹燈明
夜齋靜目溢臨書遲病齒不飲酒持杯勸妻兒豈無兒
女心惆悵桃李蹊彼昏安目前丈夫方有思

古今不殊途掩卷獨長想炎爐與死灰相去如反掌彼
昏誠不知一醉富莫量那知道傷殍曾是厭盃盞一金

短販兒豈暇議得喪但怜反覆間觀者爲惆悵聖賢蹈
大方不苟目前妄寄身愛憎間得失真一餉

春雪

天寒城南寺門外無馬迹東風雪疾消春泥深一尺豈
無老款段畏蹶不敢策還歸見兒女怕冷不下席揚雄
玄未就雙鬢颯已白雖云客載酒此意終岑寂功成則
有命生事亦人力胡爲不自勤守此欲何獲田桑既有
裕醪醴亦餘溢嗟哉好事客從古百無一

秋感二首

秋日無遠暉秋草無美姿殘蛩吊白日寒鳥悲空枝時
節一如此余出悵安歸強歌不成音還坐空涕垂感動
百慮進觸心遂紛披棄捐勿復道日暮眠吾帷

秋山多遠聲日暮尤生態百風落高樹清澗瀉寒瀨鳴
蛩默誰憐瘖死不償罪蛩啼獨不已有愬未逢解天時
激汝曹寧自知進退吹噓成踴躍芻狗忌徹祭庭空月
宵挂園冷露晨沛嗟哉心難忘拊事還感槩

魯直惠洮河綠石作冰壺研次韻

洮河之石利劔矛磨刀日解十二牛千年埋地因沙磔
一日見寶來中州黃子文章妙天下獨駕八馬森幢旒
平生筆墨萬金直竒煤利翰盈篋收誰持此研參案几
風瀾近手寒生秋色持投我棄不惜副以清詩帛加壁
明窗試墨吐秀潤端溪歙州無此色野人齋房無玩好
慙愧衣冠陳裸國晁侯碧海爲文辭盤礴萬頃澄清漪
新篇來如徹扎箭勁筆更似畫沙錐知君自足報蒼壁

愧我空賦瓊瑰詩

王晉卿惠詩逾年不報累來見索而王許酒未送

因次其韻督之

酸寒杜陵老痛飲遺身世雲安小縣麴米春遙知美味
無多子猶令此老氣如虎傲兀幾以醉爲累爭如侯家
美酒如江湖金鑿犀杓與之俱玉壺滿傾春水快銅槽
夜滴秋雨疎主人文章足賓客許致麴生來坐側三杯
脫帽我家風渴如旱田占雨虹冷官如餅君未見腹惟

貯水水生面鳴鞭走送煩騶轡坐對朝雲北風起未欲
煩公大作譙老夫自斟看淺淺

福昌秋日效張文昌二首

秋野無人秋日白禾黍登場風索索豆田黃時霜已多
桑蟲食葉畱空柯小蝶翩翩晚花紫野鶉啄粟警人起
洛陽西原君莫行秋光處處傷人情

黃桑蕭蕭秋水清田中日午村鷄鳴場邊九月禾黍熟
空原雉飛飽新穀籬籬蟲鳴村路曲道邊古墳生野菊

人稀田潤草茫茫落陽秋深能斷腸

題韓幹馬圖

頭如翔鸞月頰光背如安輿鳧臆方心知不載田舍郎
猶帶開元天子紅袍香韓幹寫時國無事綠樹陰低春
晝長兩髯執轡儼在傍如瞻馳道黃屋張北風揚塵燕
賊狂廐中萬馬歸范陽天子乘騾蜀山路滿川苜蓿爲
誰芳

罔沙阻風

大江春風浪如屋客舟迎風罔沙宿連檣接拖古岸傍
岸頭無人春草綠船頭日出炊烟起買魚攜菜來就市
漁人水惡不出門蕭條野市無鷄豚堤邊紙錢灰若雨
洗酒賽神巫降語南人艇子不避風橫江五兩翩翩去

有感三首

郁城本自貳師謀騎士拔劍猶封侯董生明經守正直
白首區區相侯國參差世事足嗟歎平聲我笑羣兒較目
前可能董子之榮辱乃在封侯得失間

羣兒鞭笞學官府翁憐兒癡佯笑侮翁出坐曹鞭復呵
賢於羣兒能幾何兒曹相鞭以爲戲翁怒鞭人血流地
等爲戲劇誰後先我笑謂翁兒更賢

南風霏霏麥花落豆田漠漠初垂角山邊夜半一犁雨
田父高歌待收穫雨多蕭蕭蠶簇寒蠶婦低眉憂繭單
人生多求復多怨天工供爾良獨難

到陳午憇小舍有任王二君子惠牡丹二槃皆絕
品也是日風雨大寒明日作此詩呈希古

初來淮陽春已晚下里數搯聊寢飯此邦花時人若狂
我初稅駕遊獨懶任王二君真解事走致兩槃紅紫爛
天姝國艷照葭屋持供佛像安敢慢江湖逢春豈無花
格頑色賤皆可揀誓觀中州燕趙態一洗千里窮荒眼
風波歷盡還故郡此願誰知輒先滿那知中夕忽凜烈
卧擁牛衣眠失旦名園泥淖安可入坐惜殘芳風雨散
東隣夫子亦嗜酒卧聽午鷄方起盥晴明猶及一寓目
我老尚能揮大醜

次韻答天啓

黃鍾無聲登瓦釜
蔡子青衫在塵土
逼人爽氣百步寒
知子胸中有風雨
三年河東走羸馬
絕口魚鰕便酪乳
歸來萬卷付一讀
不學兒曹用心苦
周瑜陸遜久寂寞
千年北客嘲吳語
莫徒彩筆雲錦張
要是寶劍蛟龍舞
天兵百萬老西北
快馬如飛不出戶
眼看六齋出麒麟
走取單于置刀俎

赴亳州教官次韻和中書錢舍人及亳守晁美叔

見贈

久知疎慵難應接勉強一官親訟牒羈窮正是鳩無巢
擺去不如魚有鬣從來書史鈍蹊徑更歎詩騷窮事業
幾思狐白易絮纊羞褫舊服求新袂又憐夸毗竟何得
把玩區區一蚊睫久知趨向合飢寒正藉文章謾嚙躡
紫微大人掾作筆誰得羸師輕傳諜知擒敢慢武侯縱
有穿前知魯侯歛荒蕪滿編求指摘望以餘光分暉暉
乃蒙稱屈力褒揚不意糞壤藏諸篋獲如丘陵飽則可

良御不悅猶非獵平生賞遇有君子處世雖鈍吾知捷
清閒得食學官祿願以詩書填吻頰牙懸喜校鄴侯籤
藤織新成沈郎笈晁公聲名三十載餘事筆蹤傳法帖
紫芝眉宇望不遠屈指數日無旬浹黃衫健步書見賜
紫誥除官等何躡久懷薄技待後乘宣管盈囊紙來歎
坐乖前計空惋悵袖裏從今雙手摩醉歸應被官長瞋
未飽徒勞方朔憎

蘇叔黨呂知止自許下見訪叔黨有詩戲贈以此

奉答

三年齊安看江山可當中原故人面北來塵埃逢故人
眼前却作江山見君似江山定不踈能出吾言世亦無
蘇郎下筆妙無敵呂郎與談驚未識鳳雛子未宜輕
囊空各有千金璧贈君錦繡英瓊瑤報我琅玕金錯刀
溪毛潢沔未相棄歲暮與君甘緼袍

遊武昌

一葉橫江凌浩渺李君見我迎門笑鵝黃初熟醅旋壓

書室焚香地新埽淋漓歌笑不知夜竹榻枕藉眠諸少
老人被暖覺獨晚驚起東南日如燒四明陳子定愛客
生火寒廳邀我到盤肴香潔具俄頃鱸斫寒魚初出沼
仲謀霸氣久寂寞元子亭基尚危峭荆榛荒梗上石磴
人物清江開野廟莫投明府快一飲主意殷勤賓屢酬
星河破碎歸中夜明日清淮理歸棹王家園館靜入眼
挂壁於菟疑欲嘯殺鷄爲黍辦倉卒看畫烹茶每醉飽
還家閉門空寂歷勝境目前皆了了茲遊可再誰汝嗇

老懶似不能輕矯西山得霜瘦如削蕭寺崢嶸出粉籜
幸余腰髀猶足使與子凌寒恣遊眺

秋雨小酌贈賈七

出門秋雨泥漫漫嗟哉后土何時乾官曹事休歸舍卧
破屋浙浙西風寒弱妻傾盃勸我起稚子笑語爭杯盤
我生樂事但如此爲爾一醉愁腸寬仕塗翩翩鬪巧捷
華裾鮮轂相追攀老來百事覺羞耻懶伴兒女塗鉛丹
賈郎豪華獨異我粉腮玉指雙鷗鬟清眸侑酒醉百醜

宵况貧甕寒齏酸堂前菊花日以好落砌撼梧桐殘
當謀痛飲待九日豪氣一壓龍山桓

寓陳雜詩

朝雨如霧絲咫尺不相辨俄然晨光漏紺碧出天面天
工易明晦頃刻俄屢變今朝事大定雲物卷組練客有
北來說蠶生被數縣穀穗無一粒遺稈如立箭卑田成
大澤投種哀莫見官人惜不知猶喜輸租辦興懷及鰥
寡猶愧吾飽飯

開門無客來永日不冠屨客知我老懶投刺輒復去
成兩相忘因得百無慮故人在笏郡書信不能屢興哀
東坡公將拚郊山墓不能往一慟名議真有負可能金
玉骨亦逐黃壤腐但恐已神仙裂石終飛去

我不知暑退但覺衣汗乾頗怪庭中天湛然青以寬有
物叫草根啾啾自相喧問知已新秋大火流金九天工
變寒暑正爾事亦繁靜觀付一笑吾事寧相關但思筋
力健悠然佳意還喧喧憎隣里砧杵亂人眠

秦子死南海旅骨還故墟辛勤一生事空得數編書琅
琅巧言語玉佩聯瓊琚知者能幾人憎者頗有餘書生
事業薄生世苦勤劬持以待後世何足潤槁枯興懷及
平昔使我涕漣知道路阻且長悲哉違撫孤

寄李端叔

陳墟自古皇疆野實楚縣沃野接神畿荒溝漕淮甸民
風靜而陋原隰平以遠我來逢艱歲禾黍秋色淺荒居
咽蛩蚓風雨老藜莧閉戶謝車馬隱几親筆硯馬迹巷

泥濼庖烟簷日晏深居窺老易妙理殊自玩困亨方寸
足夸安勞遠願乖離感歲月老色各滿面友道古所敦
尺書莫辭倦

秋日曬古城

秋日曬古城西風振塵埃出門何所之壞道連蒿萊飛
鳴鷄犬稀破屋枯壕隈老圃理蔬畦晚甲瘦未開輸人
暮出城栖鷓一一回悵然心不怡歸坐勸一杯

孫志康許爲南釀前日已聞糴米欣然作詩以問

之

平生一尊酒風月不可無謫官將十年一醉未易圖市
豈無旗亭官亦有酒壚薄苦與釀酸一滴不可沾英英
孫夫子臭味真吾徒自云得異蘖乃出粳稻腴藏久精
粹去去者乃其粗醞釀纔浹日芳甘已盈壺僉人喻其
力若火經茅蘆此語真野陋殆出負販夫前日聞吉語
糴便已在途每恨陳乏糲價直如買珠憐君久客囊傾
倒無復餘假噐走僕僮供我一笑娛欲爲漉巾潛請學

滌器如作詩以訊之何日陳尊孟

歲暮即事寄子由先生

歲暮淮陽客貧閒兩有餘朝昏面壁坐風雪閉門居老
去深依佛年衰更嗜書未能忘素業聊用慰窮途下里
皆貧屋開門即古墟鷄豚來近舍舂汲賴隣夫雪壓移
來竹霜萎自種蔬烏皮蒙燕几褐帽裹僧顛肉似聞韶
客齋如持律徒女寒愁粉黛男窘補衣裾已病藥三暴
辭貧飯一盂長鉗卧牆角短褐倒天吳宵寐衾鋪鐵晨

炊米數珠大攬隨，杜脛葛製暖寒軀。時命今如此，功名已矣乎。談愁風射馬，拙待兔逢株。久慕真乘樂，深諳夢境虛。誰憐九頓首，止有一長吁。瞻望身空老，蒼茫歲欲除。何當聞妙誨，黥刖待完膚。

贈程公吳

我昔出守來丹陽，江流五月如探湯。史君之宅在山腹，繞舍樹石何青蒼。千年藥根蟠井底，靈液浸灌通寒漿。人言枸杞精變狗，夜吠往往聞空廊。金山蕩涵浪花裏，

一舸遙去隨漁郎最奇巖齋人迹少乳水時滴白石牀
翠鼇坡陁負日色白騎掀舞占風祥我留金山几十日
窮探力取無遺忘南風吹我渡江去已厭淮南塵土黃
二十年間多少事身如疲馬起復僵淮南窮棲衆人後
朝食不充藜苳腸公來衰顏得一笑側聽高論驚尋常
窮閭過我坐至暮滿懷珠玉無粃糠乃知世間有清議
未可盡以已意量精金白璧天所寶理無破碎委道旁
半年耳冷不聞此遇公矍然神激昂論交自顧已老醜

從事理絕隨飛翔斯文有屬不但爾因公作詩我涕洟
北隣賣餅兒每五鼓未旦即遶街呼賣雖大寒烈
風不廢而時略不少差因爲作詩且有所警示

桔柜

城頭月落霜如雪樓頭五更聲欲絕捧盤出戶歌一聲
市樓東西人未行北風吹衣射我餅不憂衣單憂餅冷
葉無高卑志當堅男兒有求安得閒

書初涼夜至將曉

靈壽寺作

秋房燈火清人語久已寂城遠不聞更警柝鳴未息橫
參已入地斗柄當天植乃知三更中市鄺已寂歷我時
守書几磨墨傾硯滴反覆小學書昏目如芒刺試尋隣
房僧鼻鼾背負壁體勞徑就枕冷夢分南北覺來寺鐘
鳴僧禮像前席須臾聞梵唄木魚如叩石舉頭視東牖
朝日已淡白反身起披衣神爽健筋力亟來酒甕邊側
聽聲唧唧

霜後步西園

濃霜午暄妍短日淡無色回風振中園搖落聲策策草
根飢鳥啄飛舞時嘖嘖野荒無遺粒卒歲將何食鮮鮮
西牆下幽草弄寒碧四時不吾欺聊假汝頌刻

呈徐仲車

朝日照高簷夜霜猶在瓦纖纖牆邊柳春色已可把殘
年能幾何奔駛劇湍瀉雖無功名求衰暮亦悲吒出門
問徐子兩計決取捨爲當勉自修汲汲不可暇爲當飲
美酒送老在杯竿子當指我途我即策其馬但恐懶拙

姿終非服勤者

讀戚公恕進卷

世方尚纖柔子獨不可揉人皆喜啾啾子語不出口巉
然即之高俗子競譎詬我嘗要之難快使暴其有乃知
訪之非更覺所得厚由來難小知此固可大受讀書常
辛勤世務飽經搆琅琅滿編文一一可推究俗儒昧事
實文字工綵繡可觀不可用章甫冠土偶子能獨不然
渾樸謝雕鏤寧爲目前玩功見施設後知心古所難形

兀實見售嗟君聽者寡風雨但孤唯又思理難常功業
亦邂逅豈令匠石斤常縮袖間手無爲扣角歌且進滿
尊酌但非遽可合有所待而偶干將伏黃土氣乃在牛
斗顧君久自安蔽抑寧復久

贈江瞻道

我行于四方其所急者友嗚呼得之難百不一邂逅人
心不可齊若十指於手隨其短與長亦各有所取剛或
礪而折柔有弱而仆質良文不揚中美外莫副寬壺泛

以枵狹盜迫而陋此猶其大槩瑣屑難悉究譬如選良材棄百不一有其間雖得之猶或煩矯揉我友居淮濱飲德昔自幼豈期羈旅間乃獲聞聲歎嗟君如美玉外徹中乃厚埋藏困塵埃要以不可垢他人十不一子乃得八九餘虧能幾何不待勉而就乃知昔求艱特以見未久但憂奔莫及敢憚喘而走我心子所知濩落無所囿是以行于世往往得譏詬人才如其面不自知好醜立之明鑑前乃見其可否子於我無嫌告我當苦口我

惟於改過竊不敢自後嗟予迫飢寒子亦仰五斗何當
兩有歸投老作隣叟

與友人論文因以詩投之

我雖不知文嘗聞於達者文以意爲車意以文爲馬理
強意乃勝氣盛文如駕理維當即止妄說即虛假氣如
決江河勢順乃傾瀉文莫如六經此道亦不捨但於文
最高窺不見隙罅故令後世儒其能及者寡文章古亦
衆其道則一也譬如張衆樂要以歸之雅區區爲對偶

此格最汗下求之古無有欲學固未暇君爲時俊髦我
老安苟且聊獻師所傳無以吾言野

寄答參寥五首

昔我初見子子時客京師聞名久不獲既得過所知示
我一卷書大小百首詩我嗜不可輟熊蹯薦朝飢約子
彭城游念當行有期中間忽倉卒決去不予辭子後來
高郵我居淮之湄中間無百里詩句屢交馳客來得子
書云子久南歸投書不能讀恨我聞之遲使我早知此

扁舟尚能追遠別不執手近居不相攜每念念恨者耿
耿中腸悲子行日已南我去日已西音書不可頻何以
慰我思

蘇公守吳興山水方有主子兮從之遊掛錫當可駐塵
埃困孤鶴念子久失所秋風展其翼道使萬里去青雲
引高唳爽絕誰敢伍余駒欲西秣使我江海櫓平生二
三子往往在南土子才得所樂我拙日益魯拳拳相思
心契濶不得語

秦子我所愛詞若秋風清蕭蕭吹毛髮肅肅爽我情精
工造奧妙寶鐵鏤瑤瓊我雖見之晚披豁盡平生又聞
從蘇公復與子同行更酬而迭唱鐘磬日撞鳴東吳富
山水草木餘春榮悲余獨契濶不得陪酬賡

我生爲文章與衆常不偶出其所爲詩不笑即詭詬少
年勇自辯盛氣爭可否年來知所避不敢出諸口時時
未免作包以什襲厚低心讓兒曹默默衆人後見君不
能已頗亦陳所有君豈少取之時以佳句授幽絃喜有

聽清唱慰孤奏如何瞥然去使我不得友

蕭蕭江湖客踈瘦若秋竹苦心爲詩章日夜撓心腹清
絃無浮聲促柱有哀曲湔湔幽巖泉一一清可掬人生
於文章初苦力不足及其成欲售又困瞽者日子從吳
興公乃獨獲所欲得意有知賞幽懷免窮獨嗟余失所
投痛學自藏覆子當慰我窮時寄書數幅

夏日雜感二首

羣動入夜息我歸亦安眠脫我身上衣投枕體晏然朝

日常營營有生不可閒羲和戢其光幸此須臾間人生
一世中大小無百年胡爲不自暇長抱勤苦歎才者勇
設施誕者夸死權彼有驅其心欲休諒無緣我本與世
疎少慵老成頑何爲不引去坎軻行所艱

娟娟簷前月雖缺自媚好團團理絲蟲養身恃其巧無
能老蝙蝠乘夜出堂奧那能捕飛蚊未解聒耳鬧悲歌
草間蚓辛苦自鳴噪爾生可以默何所欲而躁鳴哇訴
其渴謂若天可禱瘖蟬死不鳴豈以詐無效悠悠羣動

情誰得辨醜好我歌豈徒然亦用自警告

西華道中

我行陳許郊十里平若掌居民雜荆榛耕少地多曠野
兔作跳奔驚鳶或高颺喬林多疾風寒澗有餘漲棘籬
蔽茅屋鷄犬入村巷主人掃土塌秣馬具朝餉童兒汲
土井敗飯堆瓦盎勿悲爲生陋自足無他望嗟余走薄
官奔走年將壯長抱羈旅愁何時稅歸鞅

讀蘇子瞻韓幹馬圖

我雖不見韓幹馬一讀公詩如見者韓生畫馬常苦肥
肉中藏骨以爲竒開元有臣善司牧四十萬匹屯山谷
養之罕用食之豐力不曾施空長肉韓生圖像無乃然
我謂韓生巧未全君不見昔時騏驥人未得飢守鹽車
唯有骨昂藏不受塵土侵伯樂未來空佇立騏驥乏食
肉常臞韓生不寫瘦馬駒誰能爲驥傳之圖不如凡馬
飽青芻

再和馬圖

我年十五遊關西當時唯揀惡馬騎華州城西鐵驄馬
勇士十人不可羈牽來當庭立不定兩足人立迎風嘶
我心壯此寧復畏撫鞍躡鞵乘以馳長衢大呼人四走
腰穩如植身如飛橋邊爭道挽不止側身逼墜壕中泥
懸空十丈才一擲我手失轡猶攢蹄迴頭一躍已在岸
但見滿道人嗟咨關中平地草木短盡日散漫遊忘歸
驅馳寧復受鞭策進止自與人心齊爾來十年我南走
此馬嗟嗟入誰手楚鄉水國地卑汙人盡乘船馬如狗

我身未老心已衰
夢寐時時猶見之
想圖思畫忽有感
况復慷慨吟公詩
達人過境貴不惑
世有尤物常難得
寧能使我即無情
搔首長歌還歎息

再寄子由先生

宛丘之別今五年
汴上留連繞一日
賤生飄泊客東南
憂患侵陵心若失
先生神貌獨宛然
但覺巖巖瘦而實
有如霜露入秋山
掃除繁蔚峰巒出
自言近讀養生書
頗學仙人餌芝朮
披尋圖訣得茯苓
云是松間千歲物

屑而爲食可不飢功成在久非倉卒上侔金石免毒裂
下比草木爲強崛涓涓漱納白玉津鍊以真元納之骨
神仙自是人不知豈爲難求廢其術我聞公說心獨嗟
欲問太虛窮恍惚奈何不使被金朱乃俾枯槁思巖窟
又觀世事不可常倚伏誰能定於一終身軒冕亦何賴
况有朝升而暮黜何如端坐養形骸壽考康寧無天屈
乃知豈即非良圖却笑兒曹嗜糠粃青衫弟子皆授經
賦分羈窮少倫匹自知無命作公卿頗亦有心窮老佛

但思飽暖願即已妄意功名心實不終期策杖從公游
更乞靈丸救衰疾

寄楊應之

應之蹉跎三十九猶着青衫困塵垢高才逸氣老益竒
我每事之安敢友逢時則駕子何患有才未用誰之醜
暴得從來失常速徐驅未用鞭其後掃除萬事付諸命
收拾至樂歸之酒聞公頗以飲自名我亦抗衡能至斗
京師常恨酒不足貧旅僅得糊其口乃知一飲尚間關

功垂萬古知難偶百年痛飲乃良圖安用金朱裏枯朽
我生自斷計已決君亦我徒能爾否揚眉鼠子事輕肥
眨眼小兒夸謹厚須防仰赫忌鵷鷄更慮致魘逢芻狗
獨醒不若鋪其糟羣犬猶須避而走遭刑每笑嵇叔夜
得計須師彭澤叟我官古邑洛之陽聞有山川亦清秀
行當釀秫從子遊更以新詩相獻侑

招潘郎飲

老人夜短睡不足勃公窗外強知時五更未明語千萬

更憎林間鴨鵝兒吹紅洗白雨三日吾園花蕊已離披
一年春事坐如此白首窮謫歸無期念此徑須沽酒飲
買魚烹肉勲妻兒更呼東鄰好酒伴爲我醉倒堦前泥

郭圃送蕪菁感成長句

蕪菁至南皆變松菘美在上根不食瑤簪玉筍不可見
使我每食思故國西鄰老翁知我意盈筐走送如雪白
蒸烹氣味元不改今晨一食如南北孔明用蜀最艱窘
百計拮拾無遺策當時此物助軍行渭上褒中有遺植

英雄臨事究瑣屑終服奇才屈強敵想見躬耕自灌畦
當時有意誰能測

讀守道詩

仁宗之初公有聲一世懦者聞之驚力行古義不顧俗
師事孫子傳其經掃堂捧杖供賤役侍師之坐隨師行
質疑問道無敢變當世始知師與生作爲文章不徒發
譏切時事排公卿俗儒毀譽無所出乃取過行爲譏評
過於仁義罪固小矯弊自合違中行人皆不及子獨過

兩者之罪誰爲輕開編偶誦子詩句辭氣磊落嚴以清
吟哦令我不能捨想見眉宇寒崢嶸高風一泯不可見
安得壯士能經營惜哉朽骨不可作徂徠廢土知誰耕

對雪呈仲車

學堂歲暮無來客殘雪漫漫風獵獵當庭古柳三四株
老翁攜帚收殘葉二年閒散百事慵飢寒不自勤鉏鍤
囊空甌倒誰復救典衣買酒將空篋人間萬事苦難齊
以醉驅愁最奇捷丈夫未死誰能測幽憂何自同兒妾

飲酣耳熱詩興適直上虛空恣陵躡飢喉凍噤誰與解
正藉醺酣得嚅囁少年舉白未嘗辭漸老深杯見還怯
何當共有種秫田免向官壚走書帖

己未四月二十二日大雨雹

夜來飛電驚我眠大者磊落幾如拳起聽但覺屋欲動
簷瓦破墜無復全是日晚晴星斗出鏡靜萬里無雲烟
乾坤變化竟誰使造作詭怪須臾間鄰家老翁髮已白
云昔見此今年木衰火濫氣浮洩激此陰沴成水堅

儒生臆度知是否天事誰得窮其源屋頭雛鴉失其母
足傷翅折亦可憐

早作

鷓鴣夜寒不得眠永夜相語高樹顛鴉鳴最早尤喧闐
啼呼相應動百千老鷄睡起足攣拳側頭端如聞九天
引吭一唱鳴宮懸時哉不後亦不先朦朧初日見山川
吾廬人起有炊烟

讀李愷碑

自唐中微北方沸胡馬長鳴飲清渭李公守節陷賊庭

身死髑髏行萬里

愷及盧奕
並傳首

百年事往誰復省一丘榛

莽無人祭荒碑半折就磨滅後人空解傳其字殺身不
畏真丈夫自古時危知烈士俗書小技何足道嗟我但
欲揚其事寥寥獲麟數千載末學衰貶多非是高文大
筆誰復作絀臣餓夫須有待紛紛後世競著述紙墨徒
爲史官費却嗟何獨此事然搔首碑前空嘆慨

秋蔬

荒園秋露瘦韭葉色茂春菘甘勝蕨人言佛見爲下筋

俗言八月
韭佛開口

芼炙烹羹更滋滑其餘瑣屑皆可口蕪菁脆

肥薑菹辣藏鞭雞筍纖玉露映葉乳茄濃黛抹已殘枸

杞只留枿晚種萵苣初生甲南來食魚忘肉味久思吾

土牛羊茁軟炊一飽老有味痛飲百壺今不說蒲團齋

罷欠申時自覺少年心解脫

瓜洲謝李德載寄蜂兒木瓜筆

瓜洲蕭索秋江渚西風江岸殘紅舞津亭永夜守青燈

客睡朦朧聽江雨青罇曉酌遣懷抱但恨鬱鬱將誰語
敲門忽得故人書洗手開緘見眉宇蜂兒肥膩愈風痺
木瓜甘酸輕病股銛鋒皓管見還愧老去筆硯生塵土
北歸飄泊亦何事篙工已束橫江櫓天寒應客太昊墟
當遣何人具鷄黍

未寒熟伏枕已數日忽聞車騎明當按頓睡中得
韻語數句上呈四大龍圖兼記至日之飲

山羊卷酥如切玉剪毛胡羊花作肉燭前醉客淋漓時

山泉更煮如珠粟，深泥三尺歸不記。日到牀前初睡足，
爾來七日戰寒熱。朝飯齋糜不盈掬，客來但辦君且去。
卧聽涓涓雪消屋，因山事嚴京兆出十驛。人人如在目，
馳表便面行野時。晴郊已動陳根綠。

和晁應之憫農

南風吹麥麥穗好，飢兒道上扶其老。皇天雨露自有時，
爾恨秋成常不早。南山壯兒市兵弩，百金裝劍黃金縷。
夜爲盜賊朝受刑，甘心不悔知何數。爲盜操戈足衣食。

力田竟歲猶無獲
飢寒刑戮死則同
攘奪猶能緩朝夕
老農悲嗟淚沾臆
幾見良田有荆棘
壯夫爲盜羸老耕
市人珠玉田家得
吏兵操戈恐不銳
由來殺人傷正氣
人間萬事莽悠悠
我歌此詩聞者愁

九月十二日入南山憇一民舍冒雨炙衣久之

石稜如刀不容步
上挽垂藤下無路
風寒雨滑徒旅愁
捨馬杖藜泥沒屨
躋攀顛墜不容髮
目眩心寒驚反顧
亦知垂堂有遺戒
身仰微官欲誰憇
蕭蕭茅屋映絕壁

門外澗澗清泉注解衣就火不能暖旋拾山薪伐溪樹
山翁生未食醯醢脫粟寒蔬度朝暮人間平地固不少
何用巖岨守麕兔秋聲四起山靄夕壞屋踈籬睡無處
披裘結束相勸歸過盡重雲下山去

蕭朝散惠石本韓幹馬圖馬亡後足

世人怪韓生畫馬身苦肥幹寧忍不畫驥骨當時廐馬
君未知開元太平國無事戰馬卷甲飽不騎玉關索駝
通萬里長安第宅連諸姨笙歌錦繡遍一國六龍長閑

空食粟霜甜秋草沙苑遊日暖春波渭川浴雕圓腰穩
目生光細尾豐膺毛帖肉珠鞍玉韉驕不行豈有塵埃
侵四足韓生丹青寫天廐磊落萬龍無一瘦豈知車下
骨如牆飢齧草根刺傷口君家古圖才半身千里騰驤
已有神迴身側顧不無意剪駿絡頭嗟失真君不見太
宗戰馬拳腹毛身騎此馬縛羣豪龍虎精神金鼓氣豈
有閒地供脂膏至今畫圖快胃臆想見虬鬚親破賊那
知但愛廐中肥漁陽筋脚蹄如石神駒入水隨烟雲蜀

山石路無行人六驥悲鳴足流血騎驟遺事一酸辛

次韻君復七兄見贈

老知山林等朝市扁舟誰能問行止長淮十日浪吹沙
春風正攪驪龍睡幽人軟語破永日衝泥攜手林間寺
坐中知兄病當已眉宇氤氳有佳氣華池神酒不用醒
人生和暢自忘形扶持陰德鬼神在洗除世緣煩惱輕
東來自慙雙鬢改相逢但覺兩眼明論詩尚愛淡生活
學道久嘆閒名聲嗟我塵埃費昏旦補則自憐聞道晚

還丹欲問僕僕仙

謂陸先生僕古仙人也

一菴更作騰騰嬾

騰騰古禪

宿謂圓明

春陰夜薄月朦朧劇談燭盡樽亦空他日重逢龐

處士可能猶與世人同

兄斷愛屏欲專意禪悅故比龐公

離泗州有作

舸舫大艑來何州翩翩五兩在船頭淮邊落帆汴口宿
橋下連檣南與北南來北去何時停春水春風相送迎
沙岸飛鷗舊相見短亭楊柳不無情清歌一曲主人酒
主人壽客客舉手明日酒醒船鼓鳴沙邊破堞不知名

行人十里一迴首雲邊猶有堦亭亭

汴上觀迎送有感

居人憐客千里來掃堂爲客致酒杯夜闌再拜客辭去
樽前美人不成舞陽關八疊倒玉船消魂此地自年年
船頭旗竿船尾拖南遊江海北長安長亭出城十餘里
柳邊人家飯遊子少年此地幾經過白頭相逢可奈何

奉先寺

荒涼城南奉先寺後宮美人官葬此角樓相望高起墳

草間栢下多石人，扶卑焚骨不作塚。青石浮屠當丘壠，
家家墳上作亭亭。朱門相向無人聲，樹頭土臬作人語。
月黑風悲鬼搖樹，宮中養女作子孫。年年犢車來作主，
廢后陵園官道側。家破無人掃，陵域官家歲給半千錢。
街頭買餅作寒食。

送程德孺赴江西

程侯治楚我獨知，去時民作嬰兒啼。歸來明光見天子，
還把一節大江西。年來屢下寬大詔，赤子未免寒與飢。

恩如憂病政如藥知病無藥何由治朝廷法度寄吏手
付授得所乃合宜事如白黑初易睹敗以容悅相蒙欺
此行委寄意不淺列城數十受指麾任官輕外最弊法
省閣無補真何爲遙知敏手多暇日不廢樽俎還蛾眉
從君多乞歛州紙歲晏天祿供吟詩

叙十五日事

五更聞鐘自驚起坐守殘燈具冠履昏昏病眼正團花
獨愛當庭月如水強驅睡味誰不仁漠漠黑甜留兩眦

忽驚左掖漲風埃已趨上閭鏘環珮平明原廟煥金碧
飢投敗幕飡寒餌紛紛僕僕酸兩脛肉食當然賤何事
走馬還家百不問掃榻伸腰真有味起來炊熟日亭午
槐葉新成庭覆翠翻書弄翰老自笑飽食安眠計難遂
古來高士不入城官聽鳴鷄踏朝市

官閒

官閒吏歸早歲晏寒欲盛槐稀庭日多鳥下人語靜幽
花破寒色過雁驚秋聽酒賤莫厭沾北風行欲勁

冬日放言六首

小兒喜學書滿紙如棲鴉老婦寒不績當戶理琵琶樽
中有神物快寫如流霞三杯任兀兀凍臉生春華

寒羊肉如膏江魚如切玉肥兔與奔鶉日夕懸庖屋嬉
嬉顧妻孥滋味喉可欲謫官但強名比者何不足

日暮歸飲酒兒女戲我前須臾徑三酌據榻已醺然老
妻坐我傍饋葢屢炮煎大勝劉伶婦區區爲酒錢

我初謫官時帝問司酒神曰此好飲徒聊給酒養真去

國一十里齊安猶最醇失火而遇雨仰戴天公仁

秦人焚詩書意欲遂絕滅六經至今存何曾損毫髮興
衰有天理人力自淺拙不憂驪山墓回首遭發掘

元子本豪爽頗復有俗氣孟嘉亦可人乃與較權勢崛
強近百年究竟成何事江左無英雄汝得免徒隸

潘郎以予生日見過致酒出兩詩

東風沛甘雨百物一時好江邊桃李盡紅紫到百草道
傍負擔子寒食歸祭禱念我淮上丘三年不躬掃

淮陽牡丹窟盛不數伊洛姚黃一枝開衆艷氣如爍
亭風塵表獨立朝萬萼誰知臨老眼更復美葵藿

嘲南商

兩袖全疋帛望知江淮客深藏計算苦好鬪意氣窄
愁逢湯餅盃遇鮓論甕咋市南沽茅柴歸店兩顴赤

十二月二十六日旦聞東堂啄木聲忽記作福昌
尉時在山間環舍多老木臘後春初此鳥尤多
聲態不一今琵琶箏中所效既不類又百不得

一二云福昌河南屬邑也

睡起聞啄木忽憶福昌春官舍題詩壁如今經幾人猶
能老耽酒依舊拙謀身尚想蘭宮路東風清洛濱

田家三首

野塘積水綠可染舍南新柳齊如剪去冬雪好麥穗長
今日雨晴初擇繭東家饋黍西舍迎連臂踏歌村市晚
婦騎夫荷兒扶翁月出橋南歸路遠

社南村酒白如餠鄰翁宰牛鄰媪烹插花野婦抱兒至

曳杖老翁扶背行淋漓醉飽不知夜裸股掣肘時謹爭
去年百金易斗粟豐歲一飲君無輕

新見鵲銜廷樹枝黃口出巢今已飛粟留啄椹桑葉老
料斗出畦新稻齊田家苦作候時節汲汲未免寒與飢
去來暴取獨何者請視七月幽人詩

海州道中二首

孤舟夜行秋水廣秋風滿帆不搖槳荒田寂寂無人聲
水邊跳魚翻水響河邊守罾茅作屋罾頭月明人夜宿

船中客覺天未明誰家鞭牛登隴聲

秋野蒼蒼秋日黃黃蒿滿田蒼耳長草蟲咿咿鳴復咽
一秋雨多水滿轍渡頭鳴春村徑斜悠悠小蝶飛豆花
逃屋無人草滿家纍纍秋蔓懸寒瓜

女几祠下

山邊白雲閒不掃山下松花龍甲老東風古栢吹暖香
廟前土馬荒春草朝霞爲裳水爲珮守廟千年老龍在
清風掃堂神暮還山頭月出溪潺潺

福昌北秋日村行

秋野無人秋日白
禾黍登場秋索索
豆田黃時霜已多
桑蟲食葉留空柯
小蝶翩翩晚花紫
野鷄啄粟驚人起
洛陽西原君莫行
秋光處處傷人情

黃桑蕭蕭新雨晴
田中日午村鷄鳴
場頭九月禾黍熟
空原雉飛飽新穀
棘籬蟲鳴村路曲
路邊古墳生野菊
人稀田澗草茫茫
洛陽秋深能斷腸

從黃仲閔求友于泉

炎暑戰已定清秋當抗衡碧雲生雁思幽草見蛩情
麥村墟靜觀書枕簟清誰能酌玄酒來破屈原醒

借一韻

贈陳履常

勞苦陳夫子欣聞病肺蘇席門迂次數僧米及時無旨
蓄親庖急青錢藥裏須我場方不給何以繫君駒

至安化驛先寄淮陽故人

蕭條安化驛倦客思悠哉積水連天濶青山送客來
疎籬風捲葉敗屋雨生苔寄語淮陽舊人今放逐回

秋日

墮葉烏不顧，枯莖蟲莫吟。
野荒田已穫，江暗夕多陰。
夜語聞山雨，無眠聽楚砧。
弊裘還補綻，披拂動歸心。

發安州作

積雨陂塘秀，南風蒿艾肥。
烏犍立橫隴，白鳥下深畦。
雲木叫杜宇，曉林啼竹鷄。
平生倦游興，賴有濁醪攜。

都梁亭下

金塔青冥上，孤城莽蒼中。
淺山寒帶水，白日吹風人。

事劇翻手生涯真轉蓬
高眠待春漲鮭菜伴南公

二月二日艤舟徐城戲呈戚郎

自嗟爲客久羈旅
過淮時雪野挑蔬
瘦霜天暖酒滯流
年下坡轂萬事覆
枰碁異日懷陳迹
孤舟近古祠

舟中曉思

樹色未啼鳥
槳聲初度航
客燈青映壁
城角冷吹霜
飄泊年來甚
羈游情易傷
年豐清潁尾
吾計亦差良

酬同年徐正夫司戶時公欲卜築嵩洛間

少別老相見無言空惘然功名屬多病詩酒樂衰年
厭顏公粥囊須趙壹錢歸裝何日辦嵩少好林泉

今早將飲酒聞鶯有感

蕭條古蘭若春日等閒斜唧唧初聞鶯忽忽又過花
舊游都似夢到處即爲家把酒聽鶯處羈懷感歲華

破幌

破幌一點白卧知千里明低窗通雪氣喬木尚風聲
傳警軍城靜鳴鐘梵刹清高眠尋斷夢鄰樹已烏驚

卷簾

卷簾新月上林影散微茫庭草鳴蟲近風燈秋幌涼長
年唯有病晚歲苦多傷身世竟何就吾將問蜀莊

日落

日落長雲暗風悲古岸秋渚鷗遙避客野蝶戲隨舟疎
拙資微祿飄零厭遠遊若無尊裏酒何物與消愁

舟行即事二首

古岸生微靄空林掛夕陽霞輝明野色天影戰波光集

烏村墟暗鳴蟲禾黍荒秋高孤月靜天末巧雲長沙晚
橫歸艇川晴列去檣登臨自多感何必寄他鄉

去去路日遠行行歲向深晚田荒更濶秋野曉多陰岸
蓼飛寒蝶汀沙戲水禽迎風蘆顫葉眩日棗裝林早蟹
肥堪薦村醪濁可斟不勞頻悵望處處有鳴砧

秋懷次韻晁應之三首

木落晚風急宵涼侵暑衣有期惟向老無計未成歸只
益顛毛脫還從髀骨肥感時仍弔古回首意多違

衰鬢不堪洗病軀先覺陰天寒白日短歲暮亂山深薄
酒醒無力危絃奏不禁謀身老逾拙三聽洛陽砧

清秋萬里興力疾上高臺歲熟雉兔飽風高榆柳摧晚
篁元自綠幽菊爲誰開寂寞無人問鄉書久不來

宿銅陵

山色日已遠間人歸路長碧天涼後濶秋物雨餘荒人
靜路傍寺鳥啼林下房銅陵竟何就空死漢吳王

漣水

孤舟逆水上野靜聞水聲鷗飛不遠水寒浪濺霜翎夜
氣岸兼木夕光潭照星長吟弄雙槳知有魚龍驚

索莫

索莫歸未得閒雲還滿空愁吟對寒日不睡到晨鐘衣
念初冬寄書憐手自封何當聽夜雪暖酒夜爐紅

宋詩鈔卷三十